

四庫全書

集部

# 欽定四庫全書

集部

海桑集

目錄  
卷一

詳校官編修<sub>臣</sub>翟槐

中書<sub>臣</sub>劉源溥覆勘

總校官庶吉士<sub>臣</sub>倉聖脉

校對官中書<sub>臣</sub>袁文邵

謄錄監生<sub>臣</sub>劉國永

五言排律

卷二

七言律

七言排律

五言絕句

七言絕句

卷三

表箋

欽定四庫全書

集部六

海桑集目錄

別集類五  
明

卷一

四言古

五言古

七言古

歌

五言律

頌

論

卷四

碑

銘

傳

說

卷五

序

卷六

序

引

卷七

記

卷八

墓志銘

墓表

哀辭

卷九

書題跋

卷十

祭文

雜著

贊

文

解

臣等謹案海桑集十卷明陳謨撰謨字一德  
泰和人生於元成宗時洪武初召赴闕以疾  
辭歸其家傳稱卒年九十六考集中年月止  
于洪武十七年晏壁於永樂七年作海桑集  
序稱謨卒後二十年則卒於洪武二十一年  
戊辰也謨書劉氏西齋倡和卷後稱生大德



間為前朝太平幸民六十餘年由洪武戊辰  
上推大德元年丁酉僅九十二年安得壽九  
十六是其家傳誤也其集詩文各二卷為其  
甥楊士奇所編

國朝康熙庚申其裔孫邦祥重刊然排律之名  
始于高棟士奇未必即用其例又靈山寺以  
五言長律入古體悼劉生詩以七言拗律入  
古體而崆峒雲居詩又以古體入律體士奇

亦不如是之陋殆邦祥又有所竄亂也集中  
通塞論一篇引微子箕子反復申明謂革代  
之時不必死節極為害理故其客韶州時為  
太祖吳元年元尚未亡已為衛官作賀表而  
集中頌明功德不一而足無一語故君舊國  
之思其不仕也雖稱以老病辭然其孫仲亨  
跋其墨跡稱太祖龍興弓旌首至先生雖老  
猶與曳就道一時老師俗儒曲學附會先生

之論動輒矛盾是以所如不合遂命駕還山  
拂衣去國然則與柴桑東籬之志固有殊矣  
然其文體簡雅詩格春容東里淵源寔出于  
是原序稱宋濂目以夏鼎商彝太羹元酒雖  
未免稍溢要在明初固颯颯乎雅音也乾隆  
四十四年四月恭校上

總纂官臣紀昀陸錫熊臣孫士毅

總校官臣陸費墀



海桑集序

廬陵文章爲江右之鄒魯自歐陽文忠公而下若胡忠簡周文忠楊文節俱稱文章宗家宋李巽齋歐陽公須溪劉公中齋鄧公青山趙公雖不大顯庸卓然文名于世元氏時又若麟洲龍公養吾申齋桂隱三劉公力追古作者猗與盛哉泰和陳心吾先生生元大德乙巳間敏而力學猶及登宋元遺老鉅公之門務躬行踐履嘗與計偕試于有司不偶即棄去肆力古文辭元運既遷

科舉學廢鄉人士子從先生講道德性命之懿接踵于  
戶庭聖朝龍興稽古崇文設科取士先生以老成碩德  
屢典文衡又以遺逸徵固辭謝去予弱冠侍教先生時  
翰林承旨宋公侍講學士潘公祭酒許公南行道廬陵  
謁先生之廬閱其文而評之曰湯盤禹鼎器之古也太  
羹玄酒味之正也唯知者能知之三君子之論若此又  
何以議爲哉先生歿之二十年其孫翰林庶吉士孟潔  
孟京與余同以纂脩大典召赴京師出示海桑集若干

卷讀之雄詞大篇誠有德者之言也在昔歐陽子為宋  
儒宗於謝希深尹師魯死序集古錄有無謝尹知音之  
嘆意謂作者固難而知者為尤難先生雖不得位于時  
其學則淑諸鄉人士子其文則見知於當代知名士其  
行則孝友之政施於家可謂俯仰無愧怍者矣而予也  
不敏學為文辭嘗質正於先生期待甚厚老成凋謝之  
餘持不足之姿承乏文翰內顧慚悚敢叙先生之文哉  
顧先生知己為未報又敢靳一言乎惜先生遭時倣擾

其製作弗及黼黻皇猷以鳴國家之盛而題曰海桑集  
云永樂七年歲在己丑四月既望山東提刑按察司僉  
事晏璧撰



欽定四庫全書

海桑集卷一

明 陳謨 撰

四言古

瞻岬堂

并序

昔者孝子行役嘗陟岬以瞻母岬何所獨無即所瞻何  
日不存雩陽黃侯以其祿弗逮養揭瞻岬以名堂蓋將  
所在乎見之按詩話山無草木曰岬係以詩曰

緬彼崔嵬坤土而隆匪磔匪硎弗緒弗童我興瞻之念

母劬躬嵌巖窈深可以容與其岑其蔚膏發泉乳我心  
孔悲念母鞠撫暖翠在庭朝爽盈襟宛兮慈顏春和煦  
林孰是金行爲此恹栗鶴髮其彫霜露既集攢峰叢巒  
羅立間間既有令子亦有賢孫風木之悲寸草之傷甘  
旨在庖綵烏在堂祿薄養豐其樂如何豐而弗逮所慨  
實多移忠之孝亶惟盡瘁教忠繄母展也孝子孝子終  
身悠悠瞻此

咨詢堂詩

并序

天下郡縣建牧伯守宰必立風紀之司以蒞之風紀肅而善惡彰美化成矣乙巳分憲李公按部至廬陵而八邑之鉅姦積蠹盤根狡兇翦難剔抉發謫無遺鄰郡聞風膽落將去吏爲民不可得蓋自壬辰亂民間不識繡衣久矣一旦震霆起蟄於涸陰之餘嚴霜殄殄於炎荒之野塗歌里詠松栢悅何可勝紀吏厥知所向始萌懼心廬陵舊有按察司公扁其堂曰咨詢而大書揭之其屬邑士陳謨僑賴聞而踴躍謹獻詩曰

奕奕巖巖風紀之堂雪氷其柱鐵石維梁鳥飛過之不  
敢下窺高明有抗神物訶撓十載之曠一日而偉如翬  
如翼繡衣戾止有扁崇崇端正不頗珊瑚碧樹交結枝  
柯憲綱之振在悉民隱于咨于詢是謂繩準幽者潛潤  
遠者峻壁聰察或遺孰伸孰抑芻蕘之賤商工之卑勿  
卑勿賤言亦有裨虎冠狼牧童子能言審矢彊針明者  
昏焉孝婦之早三年尤劇決獄之雨頃刻而集穆子格  
言著於春秋咨謀度詢必務於周巖巖李公服是明訓

惠我廬陵以風列郡百邪以正衆枉斯雪載瞻堂扁居  
不栗烈公德在民公轡在野峩峩穹碑式勸來者

朝陽詩 并序

朝陽美韶陽錢史君也爲政宜民德如朝陽故以頌其  
豈弟也

瀛海之東桃都之山有木相扶蔚乎盤盤金鷄既鳴日  
觀斯出鴻濛之枝其赫有奕乃浴于海遂升于天蒼蒼  
涼涼維氣之先君子鍾之剛健其德匪維剛健抑又溫

克穆穆暾暾冬夏一致彼晝而親愛畏或二我親其朝  
有愛無畏君子作牧召父杜母寧寬以擾無猛而勢韶  
石之上舜峰之下湛湛露晞皇華被野嵎夷之宅暘谷  
之賓成歲定時義和紀勲寧獨韶陽史君遺愛式邁其  
歸光于昭代

五言古

萬年樹

俗名冬青結子紅明似櫻胡宮中多植之對搖落而淪

荊棘傷而賦焉

翳薈隱嘉樹窮冬常不彫  
堆魁火齊珠錯落英瓊瑤  
直幹不偃蹇爽氣何飄蕭  
碧梧與翠竹無此晴霞標  
憶昨甘泉宮含風鬱蕭蕭  
鳳凰五色羽翔集不待邀  
天子重萬年當之奏雲韶  
王母留佩環月明耿良宵  
如何海塵起蜃霧腥丹霄  
惡草薦煌煌不材聳翹翹  
懿此麗荒寒容華日以消磨  
牙集豺虎隨羽羣鷗鴟引睇  
蒼梧雲重華邈難招徘徊將  
何及落景騰山椒

送友人之鍾陵

以我白石歌壯君黃鵠遊笑騎將軍馬踏遍西山秋古  
之大哲人於此懷民憂鐵柱繫長蛟斗門遏洪流地軸  
安其常水靈何所求長笑蜀太守空立三犀牛繫此十  
萬家高柳連城樓形勝自天開攻守由人謀綵筆爲我  
題宣城美才猷寧知東湖水可以藏漁舟

雲壑簡南安陳知事

達人本雲卧丘壑外軒冕神明交澹泊樵牧相偃蹇伊



優與骭麟叔世同一貶淒其望諸葛憂抱何能展甘霖  
幸一溉涸鮒將冀免歸巖出有時潛石不相遠橫浦極  
天高懷人路悠緬英英露菅茅蠹蠹飄素練嵌虛隱空  
翠窈窕涵惹舊雖復簿書繁而無塵鞅絆摘章喚陰鏗  
作賦招王粲涼颼散冲襟清波送流盼亭亭金芙蓉似  
是武夷澗花下藏仙舟漁郎莫之見濟勝天與遊流霞  
共誰薦

甲辰九日遊興國靈山寺簡同遊

車馬爛輝光登臨向上方攢雲衆峰直引路萬松蒼澗  
底蒲茸白籬根栗葉黃爽猶宜羽扇晴復麗羅裳縹緲  
雲闌峻巖巖石徑長雜花明亂草好鳥隔幽篁漸近精  
藍域俄聞洞水香棟梁何峩峩金碧極煌煌崖裂獅初  
嘯巒迴象欲狂鯉魚新上水靈鼠舊依倉四句皆山形石筍  
何年長池蓮此日荒鐵船歸瀚海方竹壓瀟湘瀑散晴  
空雨林含伏日霜行雲走神女卧鉢隱龍王一紀長離  
亂叢林半在亡如何超劫劫獨此見堂堂喜挹清河彥

兼承入幕郎風流同茂宰嘯詠及重陽杯紫浮萸烈餅  
虛挿桂芳高僧慣賓客才子盛文章壁怪前題漫游疑  
後日忘少陵多秀句偏在賛公房

乙巳正月携家自永豐蕭原鄭大中氏復歸平川  
雪晴郊行分得數字因用述懷

鶯飛窮孟陬鴉喜喧晴宇食罷澹無營意行愜幽趣車  
縫六七人諧笑雜今古出行仍闕市負郭皆樂土霜留  
草頭花雪落松梢雨山翠掃嬌蛾水光搖浴鷺梅殘驚

縹緲柳弱未金縷縱橫野人廬大半無外戶皆云縣官  
好所病在軍旅近時哨糧卒出沒甚虓虎劫財野爲青  
殺人血漂鹵以茲不有寧全家入城住縣官極保障郭  
外今安堵官軍多下流執訊繫長組向來劉表鷹化爲  
張湯鼠家人尚未還賓主闕茗具昇平亮可復離落勤  
遮護桑柘即抽萌驚鴨尚多數芳菲亦未通笑指桃李  
樹乘除理則然甘苦要相補我從去年秋不得戀墳墓  
避地來平川誓將遠抄虜淒涼墳與簷白髮走歲暮彼

是天一方鱗鴻杳無據前登胡公山似蝨緣壁度懸崖  
臨不測仄徑憂跌仆竦身膽爲掉况敢一下顧喘噎投  
村家村家亦寇伍危言相恐迫云此難久駐喚兒自束  
髮導客從兒去所利客資囊奪攘俟中路我家一百指  
幸不罹此咎脫身走鄭鄉犇竄泥沒股鄭公素長者見  
客深慰撫薪米既幸周時亦分酒脯草菅藉地溫伏枕  
且無慮新年返平川復此名勝聚自聞野人言驚悚狂  
欲舞縣官希魯卓才子追沈杜深懷五色筆隨意數行

醕清吟勿體拘占韻實齒序藹藹春雲垂冷冷石泉語  
志喜亦未然姑將紀愁苦

夜飲簡同席

華月流中天美人集公館戰塵良已清涼颺且賓雁對  
此念君子萍蓬各鄉縣賞勝如前期會心豈在遠曠懷  
諒所同樂酒皆維宴駕言望廣寒所思邈遙漢玉兔擣  
玄霜爲誰駐顏面蕭蕭青桂枝吹香助芳薦殊乖建安  
才虛辱高賢眷微詞苦難工所適非所玩

貞婦

時運忽復乖，兵塵昏白日。  
風花信所飄，安得念茵席。  
所悲命如葉，自誓心匪石。  
出即依旁舍，歸斯匿深壁。  
充徒肆披猖，鷄犬俱辟易。  
罔俾荃爲茅，寧甘血成碧。  
哀哀八歲兒，抱母同毀壁。

分韻得杖字三十韻

西林萃雄峰，衆山此其王。  
秀如冲霄鳳，險若排空浪。  
高木鬱扶疎，旭日明滉漾。  
何煩紫蓋朝，默已通蓬閣。  
太史

覽九州於焉憇仙仗遂令百里間疲癯走祈望高明當  
中天拱衛羅萬象是日正重九晴雲開蕩蕩往來三四  
公白髮森相向始自泮水涯青錢挂筇杖徐昇閱武亭  
宛見武安像飛步凌數階恍然層霄上始悟出城闐頓  
隔螻蚋盜稚松早騰笏香草極條暢落星不上天伏鴿  
猶在壙顧侯鎮是邦文武古良將馬軍送行厨時羞壓  
冬釀寵茲數君子園綺相少長佳句况絕竒意重千金  
貺朋徒有清歡觴酌無限量侯惠不可忘羈懷良自曠



吾愛元陽子至寶不慢藏  
掉頭不能吟養真有嘉尚  
吾愛霞外人飄蕭雲鶴狀  
身藏一黍微氣溢九垓壯  
自慙局方內探道肯多讓  
言誇豈是玄夢斷猶成想  
譬如水中月誰能擒不放  
歸途醉昏昏逸興殊悵悵  
遙禮山上雲雲深暮鍾響

張思孟賞菊席上次葛誠夫韻

十月菊始繁何殊艷陽花  
衆芳誠所存獨萃清河家  
琴樽暢襟抱金蘭盛才華  
煌煌錦綺雲承以朱翠霞  
餐英

想靈均吹帽懷孟嘉極興從淋漓笑諧絕疵瑕晚節相  
與娛吾生良有涯

題秋江送別圖贈鄺彥誠

祥鳥有慈母旅食他山樹波淨涵金螺沙明橫白鷺飲  
啄遊其間逍遙娛旦暮祥鳥夜夜啼所思在返哺唧悲  
訴鸞凰乃得導先路往還里數千離淮復經楚兒髮白  
不多母顏渥如故白鷺安敢留金螺送東注霜降潦水  
收冬溫柳芽露望望故園春淮山湧晴霧

哦松謝丞託興於琴劔金玉各賦一章因賦答之  
爲琴爲遞鍾水繭絃孤桐下堂寫猗蘭上堂奏薰風一  
嘿成連師無虧昭文氏所貴薦郊丘何心勞鄭衛

爲劔爲豪曹吳鈎非寶刀鳴匣欲剗犀流星利吹毛嘗  
聞武庫災穿壁徑飛去勃勃芒碭雲赤帝何由遇

爲金爲紫磨太白無顏色不歸董卓塢肯近王濟埒丹  
砂安可化水銀安可成淮南枕中術舉世高其名

爲玉爲截肪含章而永貞入火火弗焦沉水水弗冰守

珪與五瑞雕琢備文質成器有相資懿此他山石

溽暑作古意六首

并六句

濕雲涵薄霧日光如鏡塵楊花吹滿床燕雛嬌近人雙

雙白練帶街得櫻桃新

微薰似清暑復慢幽人肌泉聲翠帷隔花艷玉瓶滋誰  
緘雙青梅題作無情辭

溶溶雨沼波宿來得新魚但看萍無蹤始悟魚安居莫  
照釵頭花釵落驚雙鳧

翦下菖蒲葉換却沅蘇帶雖微纂組工自是清淨態畫  
簾景遲遲瑠盤香靄靄

困多病不如塵生風自卷蕉心先雨開菱花後時翦宿  
有錦字書教兒枕頭展

枇杷香在手將餒隴頭鸚鵡嬌鳴久不食振羽謝多情從  
今無浪言浪言郎君驚

游天慶觀登衆妙堂興歎堂有玄元像竒古而蘇  
公小大二碑及居士泉皆廢蓋戎卒居之

琳宮宅甍年褻汙衆妙門試窺擣衣砧上有眉山文上  
堂羅兒婦下堂飼鷄豚塑像古且奇稽首玄元君端居  
燕穆清誰使居人羣亦有居士泉澄源爲之昏那無一  
寸膠可洗千丈渾

西湖行樂圖

生綃動湖光長夏宜清暑芙蓉散風漪勁栢留晴霧行  
無羽扇塵樂有瑤琴趣令德將遐齡魯侯深燕譽

夜雪

耿耿茅簷下明燈看飛雪犯此太古寒因之百情熱匡  
山有神人路斷梁亦絕舉目但悽怆星霜變玄髮狂歌  
白石爛往往達明發

敗菊

敗菊如佳人粉面初酣酒猗猗耐荒寒蘭芷相與友緬  
彼仙桂枝金粟照窓牖吹香逐環佩乃亦襲塵垢獨秀  
搖落餘肯與繁華偶故應鄙陶潛憔悴五株柳吳生何  
人斯礪斧君知否

題種德齋豫樟

豫樟材之雄拔地恒千尺冥將霄漢迫密是鸞皇室斬  
伐遭時艱根荦走石壁先公餘後澤條肄今砢礧又復  
儲棟梁溪山再開闢樹德必務滋垂猷遠翼翼幽齋陰  
瀟洒絃誦終日夕成蹊者桃李充牣皆黍稷樂地貴名  
教高風仰賢式蔽芾晉公槐蒼寒孔明栢邦人所敬恭  
君子以觀德

題蕭氏友恭堂



庭前紫荆樹四時根如石誠非雨露私乃是友恭積蘭  
蓀產其陰松桂左右翼清風列嘉賓賞弄終日夕伯氏  
髮已種溫溫金玉質才堪百吏師興逐壺公逸仲氏鶴  
昂藏家事久云敕衣內滄海珠枕中淮南術脩髯引清  
風叔子秀而栗鬱鬱眉睫間色矜新句出塤箎吹若貫  
江海潤交益兒孫束禮法中外罔嗟戚然莫謂曹丕酣  
酒傷牛弼不見九江人同堂廣長席不見安豐生自結  
天翁識雞來哺狗雞犬俟同牢食行當表宅里遠可風

百億況乃陰德深高曾所培植我來數升堂雅素最相  
悉廬山王文學金蘭契方密長歌樂知心高文已在壁  
鄙詞雖匪工聊用勸無斁

弔越王臺

昔者虞翰林盛製越臺碑讀碑多勝槩登臺但荒基王  
昔乘黃屋自云帝蠻夷迷途殊早復臣節終無虧陸賈  
信自賢任器豈真癡臺今廢興幾終古名不移海山萬  
景赴豈殊隆漢時乃知登覽勝曷以臺觀爲

穗石洞天即五仙觀仙各持一穀傍各立一石則  
五羊也

吳晉紛紛日荆交讓讓時五仙持五穀爲拯斯人飢  
脩加撫字郭璞徙城池羣生日以阜兩賢功同歸五  
羊上天去白石今纍纍至今稻梁豐不數蝦蟹微瀉  
出牢盆堆疊如山坻化爲百萬糧充君節度資兵民  
兩足食市井相娛嬉懷哉五仙人垂德無窮期

讀五賢傳偶成五首

昔在山陰縣風流顧凱之茂林當戶遠白日下簾遲興  
寄丹青裏人懷豈第思越山千仞碧俯仰共心期

右詠顧凱之

楓柳雖合抱何如齋中松縱無棟梁日長會九天風正  
聲若金石擲地諧商宮尋我遂初賦意在山水中寧知  
桓司馬復與此心同

右詠孫興公

辭吳還入洛雲漢昭文章玄圃積白玉纍纍俱夜光長

歌豪士賦委質成都王列軍朝歌城震鼓數百里悲風  
天際來牙旗遽披靡至今華亭鶴聞者爲流涕萼羹敵  
羊酪黃耳爲書郵顧榮既知己士龍亦東頭吳中佳山  
水卒歲宜忘憂

右詠陸機

笑疾故自佳吾以全吾天况識墓中人飄飄喜談玄後  
儀有畫像名亞卓魯賢胡不傳循吏而以權門愆自非  
東海恩難雪成都冤大笑落水時流風至今傳

右詠陸雲

閣道東有大牛王濟鞅裴楷縉和嶠刺促不得休寧知  
投分寄石友白首同歸俱被收牧羊酤酪俟伏臘灌園  
春稅何所求夫人輕軒兒戲綵天下樂復有否九卿司  
馬安通人和長與巧宦信有之用拙寧非誣我思陶徵  
君養素傲樊園黃菊繞柴桑清風滿窓戶

右詠潘岳

題夾谷行樂圖

麗景屬芳晨，濃春滿郊甸。駕言使君車，旌旗望中見。  
嚶閭時禽宛，宛低風燕。田畯各歡集，山農悉矜眩。  
深耕務所先，復此勞身勸。溫言匪文具，善政諧始願。  
耒耜大，夫勤豆籩。君子宴野人，禮法踈曷以助。  
芳薦青青陵陂麥，一穗獨堪獻。使君占豐兆，歡賞杯急轉。  
簪麥不簪花，衆賓雜歌忭。勝槩入畫圖，風流足吟玩。  
披圖向他年，可入循良傳。

吳孝廉九臯歸舒城

黃蘆日蕭瑟賓鴻念長途晨興謝執友欲發仍徐驅請  
爲君子行言送孝廉車水有深潛魚林有返哺鳥綵衣  
化爲衰落景傷倚閭陟屺歌白華飛雲增鬱紆鳳凰有  
丹穴窈窕臨古舒醴泉噴巖阿竹實垂庭除飲啄愛羽  
毛他年御瑞圖願君崇令德金玉堅不渝

弔落星寺

移船落星灣不見落星寺灰飛劫已空石在頑無智嘗  
聞容樂點豈是關天意覽勝懷昔賢金仙久無寄星宮



環紫垣官守寧容棄向來果何愆一斤淪九地化石竟  
不歸千載同一悲

七言古

題呂仲善所藏汪水雲草虫卷子

并序

卷中百虫各極情態而終以大小數鴈豈所謂江南破  
百鴈來乎水雲寓黍離之感於畫圖觀者淒斷

瑤琴理罷松風長嬾上湖船看歌舞行雲流水有心期  
野草閒花各天趣紛紛蟲羽恣飛揚散入毫端無遯處

尋香逐艷何從來含睇凝情如欲語黃荃崔白稱好手  
妍吮朱鉛眩童豎不肥不瘦潤有餘墨暈生春獨清楚  
春蘭脩然如處女短不出叢秀眉嫵夏芷仙人白紵袍  
長身玉立風生宇何當石根容我步烏紗筇竹從容賦  
漆園蒙莊知道者夢裏化爲蝴蝶去蘧蘧栩栩情態多  
什什伍伍花間住顛魂無定抑無歸粉翅織紋何用許  
象房守宮半夜走玉帳佳人成白首絡緯蕭條蟋蟀寒  
山河已落他人手籬根暄暄牽牛花瓜蔓藤枝亦何有

西湖清淺綠荷彫畫橋依約春風柳海潮不至天目傾  
七寶金鞭從北狩雙雙朔鴈俱南翔莓苔菰米連瀟湘  
飛鳴宿食各自得豈有矰繳仍須防道人蒿目難爲傷  
銅山淚盡天亦荒琴歌既斷賦無續畫圖彷彿存興亡  
平川呂氏好古者不鄙謂予題此畫忽憶秦皇漢武年  
萬事輪雲如走馬

題青山白雲圖

劉生用墨如用兵墨如雨點鴉亂行須臾生紙氣飛動

浮雲白白山青青秦皇昔向湘江下怒伐湘山山盡赭  
此樹能逃烈焰中至今瑤翠森如畫窈窕復疑盤谷中  
書癡擬欲挂高松饑煮肉芝分白雪寒披栗葉嘯天風

題春江送別圖

跨牛菴前松兩株跨牛菴中誰讀書金華仙伯黃太史  
至今虹霓四壁光有無往時聞人侯獨駕一蓬雪來從  
太史遊風致兩奇絕賢郎故是鸞鳳雛僑居奉母樂有  
餘七千里外懷定省新年欣得陝州書黃河缺牛安且

都河中水暖多嘉魚民恬俗熙官府靜召南復頌賢大  
夫賢郎江頭買舟好六月潘輿到家早公館甘棠蔽芾  
陰壽觴先進安期棗書史孫碧霄寫景春江潯別意恒  
苦多畫意恒苦深江清柳碧天沉沉誰能贈君綠綺琴  
沙鷗往來未近人燕燕亦復多好音江水去不迴柳條  
空爾長松飄金粉綴離席絮住淨萍隨去航就中龐眉  
老禪伯夙昔賢侯心莫逆河梁日晏重牽衣一望青山  
三歎息歎息深深禮白雲但祝平安厚眠食郎君歸戲

綵衣披圖吟詠想依依月明却憶金魚浦應是南來翔  
鴈飛

喜雨行爲瓜爾佳縣丞作

田將入種黃塵飛高原卑隰同歔歎秧苗盈尺日夜老  
南風捲地吹人衣夾谷賢侯心栗栗憂國憂民賦安出  
清平禪關地高迴龐眉老衲動如律松頭上接雲氣寒  
栢樹遽作龍身蟠寶瓶楊枝初洒潤風雷奔走驅濤瀾  
免冠散水城南北通身是雨皆天澤連日滂沱不暫停

大湖長陂收不得斯民呼舞賢侯燕白下由來壯哉縣  
今年奉公百不憂穰稔高低滿郊甸

金柑花

金柑花鉛霜銀雪盈極杈獨當伏日偏榮萼綠珠金彈  
葉重遮半黃可恨飄籬笆數枝尚復秋始花花不成實  
徒紛葩高枝蠹穴心久瘕秋高恐畏成枯槎扶蠹推盤  
何當加低株三尺陰萼萼始自脫略茅與葍試花寂歷  
明晴赧秀色已似卑梨楂后皇嘉植楚甸誇憶昨包貢

天王家兼程星火疲駟蓬萊歌鐘觴九霞傳柑曲宴  
恩波奢塵飛道斷虎奮牙下州斬伐無根芽他園見之  
何悵邪天王北狩黑海涯故侯誰種青門瓜楊梅荔子  
金枇杷紛紛並得登籠簌金柑花委香屑玉同塵沙行  
歌花底沾烏紗歌成謾起園官嗟

題瓜爾佳同知畫像

卿雲景星麗天目吳峯如繡江如醕鍾奇毓秀誰最多  
九苞鳳凰維夾谷大明啟運朝明堂覽德遂與羣龍翔



西江下邑煩撫字勤勞祇用躋民康井井栽桑陰覆野  
歲歲菜田有新稼萬頃黃陂澹更清一襟寒雪光相射  
丹青寫出廟堂姿唐代衣冠遠有儀瑶林瓊樹風臨賦  
預想凌烟閣上時

次瑶支石望鞦山

舟移瑶支下遙望石如屣舟人云是大姑娘一掬弓彎  
曾墮此吾聞古有巨人跡姜嫄履之生后稷神靈竒蹤  
此其一水仙羅襪凌波輕安取盤囷如此石又聞大禹

乘四載濬川來經彭蠡濱遺此表徵千萬春江神呵禁  
疇敢登偶一踐踏風雷驚導河自崑崙砥柱碣石壯本  
根瞿塘灩澦堆舟航不敢爭飛奔長江鉅石天意存此  
其小者疑屣云君不見小姑健兒女將軍劍峯屹立當  
海門

落星石

星宮墮江化爲石作鎮鯨波與蛟室東西日月異崑崙  
金碧樓臺自甍率海枯塵起劫火飛陽侯鼓波竟何術

大船駕海貍貅來戰罷湖中血波赤至今白骨堆山丘  
此石雖頑淚應滴君王掃除江海清匡廬五老復精明  
南朝三百六十寺安得乘雲取次行

題謝令尹朝京得意圖

緋衣皂帽朝天客如龍駿馬桃花色垂鞭緩轡曲江頭  
賞遍咸陽二三月亂來奴隸皆輕肥使我復憶開元時  
畫圖忽見驚相問不是知章定牧之

悼劉生

劉生少年美無如壯志只欲攀雲衢焉得青藜照天祿  
苦遭燕麥迷玄都故園花木愁題鴉綵服庭闈歎蟋蟀  
白壁久寒黃土暖更堪老樹夜鳴烏

史君雨爲徐知府作

甘雨注三農舞村村歌且謠云是史君雨四月欲盡五  
月來政恐腴田變磽土史君五馬走青原神龍騰驤離  
洞府翻倒銀潢挾陰霧澗溪爭赴長江去一夕良苗青  
尺許老農言百無苦昔憂井枯無飲處陂塘不得瀦魚

鼈爲人取丁男租稅且闕供婦女徒然力機杼木皮草  
根紛可煮何似舂杭仍飯黍園蔬復葱蒨不肉美堪茹  
家牛不賣日取乳牲肥酒香楓社鼓時時取歡覓隣父  
醉裏長歌史君雨

歌

觀瀾歌

并序

湯君堯佐世家浹水爲望族故有觀瀾亭自其大父父  
游衍翫適而君少時讀書求志於其中君既以才諳選

初調佐吉州司市征覈而貨阜官理而務清辭字平臨  
大江風漪雨穀月湍雪瀧四時朝暮瞬息造次無不可  
觀君慨念浹水懷祖父不置友生劉元實因以觀瀾副  
其志致能賦者率賦之按字書水因風起曰波又云瀾  
大波也夫水淺深大小絕殊故海瀆河江汝漢淮泗瀾  
在在殊善觀者隨大小淺深皆可自得孟氏蓋云有術  
故也即瀾何所獨無抑善觀者希耳君脩於家研於學  
契夫瀾也深矣又能所在致愛致慤著存不忘匪徒善

觀而孝思發焉斯不亦善之善者乎乃爲長歌之其詞  
曰

沛之水兮泓以洸不洸洸以瀰入兮不騰騰而潏張其  
聲淪淪兮其肆以洋有美人兮亭之皋服且食兮咏以  
陶始涵淳俄淪淪兮噫氣怒而相遭文雲雲兮又瀰瀰  
錦機錯理兮象緯飛奔忽魚龍兮軒舉亂藻荇與行雲  
盪日月兮弗支送鳬鷺兮在壘吾雖弗及觀海兮吾既  
得夫委與源準千濤於一波兮又孰弱夫湍而壯瀾懷

先人之不可見兮臨長流而永嘆曰盈科與成章兮佩  
明訓以乾乾吁嗟乎美哉洋洋兮永矢而弗諼

歸猿洞歌簡玉華遜叟

我本白猿翁來尋碧環女望山但覺藤羅深入門唯見  
花成塢花間蝴蝶爲我語解君佩纓媒洞府自應託夢  
無險阻鳳凰飛來嗒以哈子非西行牛秀才昭君匈奴  
猶可笑野狐惑人何媚哉孫郎前身孫供奉袁氏化形  
妖氣重峽山要是萃逋逃狐女觀心國師動翁所佩蒼



龍精試一舞耳生風旌陽斬蛟江水中何當一掃山爲  
空我聞鳳凰言還謝雙蝴蝶畫船東下山蒼茫間向江  
心弄明月

### 蕃塔寺

金天聖人面流沙流蘇帳暖飄金花一從蕃僧起蕃塔  
常言彼此爲一家朝朝上塔呼天應天門只在蕃塔頂  
碧甸雙睛白纏頭大師端坐如堅忍梵夾斜行只自識  
蠻音鳩舌聽不得菩提樹下學談禪彈指蘭闌笑如吃

塔上金雞四面飛可憐宛轉無定栖狂風吹落市人笑  
何日飄蕭渡海歸

甘湖九曜石石皆劉漢自大湖徙置大者名九曜  
樂州甘湖百丈餘中有長生之神魚天星入湖化爲石  
短肥長瘦八九株醉翁上馬嗔索扶蒙頭衲士病且癯  
熊蹲豹躑猿狖攫麟鳳不動雲凝舒嗟哉天星母乃愚  
下俯奧滌甘同汙煙霏雨暗叢百恠鷗鳶糞頂鳬鴨呼  
嗟乎南中不可以久留何當返爾大澤與具區

魚樂圖爲王石泉賦

石曾曾兮寫琴泉洲重洲兮隱釣船美人兮收綸湛空  
江兮遙天鶴汀鳬渚兮長短相憐羌林水兮翳然我所  
思兮濠濮之間澹松雲之滿几服芝朮以忘年

吳元年客韶陽戲作海桑歌

海田茫茫皆種桑鴻濛萬劫復長陰連壺嶠礧空濶  
枝與日月相低昂桑根老人太清史肯向人間管甲子  
伏羲三十萬春秋一年一醉如流水雙鬢白盡還青青

至今愛寫換鶯經只釀松花嘗滿甕與君歌笑走沉冥  
歲已未年七十有五作百字令以自壽

安期瓜棗問今年海上怎生遲了七十五年看又過更  
七十年難老吟首歪詞寫張歪字送與陳搏笑笑時冷  
眼乾坤龍虎顛倒追念一度長安再遊汴水那用希  
夷號三百年中多少事一夜連床怎道易象卦圖天根  
月窟有何人能到爲君長嘯洞天鐵笛春曉

五言律

臘月三日次康山廟阻風

風滑不成雪雨寒徒滯舟湖低山石長天盡水煙浮漁  
子身如葉將軍命睹侯報功存廟食白骨謾成丘

爛泥湖著淺和韻

波濤遭險路風雪迫殘年空濶疑無岸蒼茫但有天冥  
行良獨苦著淺待誰牽舟子不知水長吁斷復連

版子磯

巢湖小龍子作鎮版磯頭遊戲騰玄象端居拱赤虬兩

峯攢馬耳一水挾鴻溝遙寄新詩句明珠或見投

登峨嵋亭弔太白墓

神氣歸天上江頭徒認墳花留宮錦色星動翰林文過客多題壁摘辭難逸羣祇應掃松雪可以薦清芬

望九華山

秀色似匡廬芙蓉擬不如遙知五老者深羨九華居採藥閑騎鹿眠雲或著書歲華詎云晚於此遂吾初

峽江周郎墓

此地亦巴丘將軍豈昔遊風吹大樹老墳對古壇幽廟  
祀存邦典時艱惜勇謀小喬殊凜烈爽氣共橫秋

題復初上人松雲山房

挂衲雲根松結巢松頂雲千年養金珀五色麗乾文松  
風引名勝雲月淨囂氛待携陸脩靜酌酒聽桐君

吉文費赴考功

壯志已云達守官仍一窮桑麻焦土後花柳閉門中貞  
石書遺愛輕車赴考功臺城天尺五鳴佩列羣公

寄韶州段同知菊圃

貳守聲名久河東古絳州儀曹陪法從樞府接英游夏  
館榕陰滿秋籬菊蕊稠官居隨地好山水自風流

病起聞蟬

蠟樹一蟬吟北風吹客襟時添栢子火坐擁木綿衾伏  
枕身如蛻觀書力不任清虛來漸遠於此識初心

別黃侯歸岳州青陽里二首

奕奕青陽里江船秋到家鴈從彭蠡過月向洞庭賒砌



長公孫竹園開子母瓜莫令生白髮應自問丹砂  
天地一虛舟水烟相共浮不隨蒼玉佩未弊黑貂裘  
友涪翁傳才情謝朓樓君山有仙子吹笛待來游

題秋江圖送青陽君

秋水雨添碧秋江柳復春行歌螺子浦言送青陽君  
南岳雲峰靜金華石色新懷賢空見畫情緒若爲論

渡江

釣艇浮螺子依依夕照前鳥飛黃葉落山斷碧雲連野

暝蘆花白天清桂魄圓紛紛樵與牧長嘯入蒼烟

題小景

使者求才俊官船倚杏花春光連楚甸鶯語似京華松  
潤藏雲密洲迴帶石斜秦淮到應賞明月滿家家

聞道二首

聞道潼關下黃流似海深由來天設險過者日傷心漢  
殿芝房冷唐陵玉甃沉不應有佳氣鬱鬱尚如今

中夜居庸北蒼茫見帝星翠華烟漠漠沙草月熒熒象

緯尊南極鯢鵬返北溟感恩餘老象粉骨向心亭

送子卿還家奉親

雪紆唐人服香羅女直巾行吟楚澤畔猶是葛天民  
茭白炊烏稻橙黃鱠紫鱗登高應最樂戲綵侍嚴親

送郭思信遠遊

不謂公家役還爲壯歲遊風吹木蘭槳水發蓼花洲  
彭蠡漁歌晚秦淮月色秋瓊花無恙否幾月到揚州

和陳中常贈別

相見即相知相携未忍離神光湛盧劍高誼角弓詩單  
父琴三疊河陽花滿枝逍遙行樂處別後定懷思

壽星圖

雲根一丈人長眉如柳青調笑赤松子出入紫微庭文  
鹿銜芝草金童把玉經武帝何由識空瞻南極星

社日偕郭思誠伯仲郊行過其先人墓

桃李螺江浦晴天散暖雲沙明靈運屐花照信陵墳入  
饌池魚白治顰社瓮醺人生行樂耳春色已平分

寄川上隱君

停雲疊雪鱗浩蕩十洲春高卧容安石耕巖樂子真絮  
花籬落靜梅雨篆烟新蟻蛭空多事鷗波只自馴

蕭氏公孫竹圖

孝竹參差寫光輝八葉蕭巖巖商皓節楚楚阮郎標掛  
壁紅芳映迎風綵鳳飄五君來往熟得醉不煩招

蹇驢

使爾不爲蹇知非果下孫卓錫疑是駿漆步僅如豚暮

雪灞橋水春風錦里村  
慙慙詩伯愛遲鈍向人言

江橋晚景

山欲收屏障雲偏曳葆綵  
水侵楊柳渚帆倚夕陽橋  
夏綠團空翠秋雲盛麥苗  
携書歸隱處不待太沖招

懷楊子將

建安七才子江夏一黃童  
鶴爵那銜鱣琴高不化龍  
羈孤千里易孝友一生隆  
最有宜春恨魂飄結暗松

池上萱草

池上多萱草雨餘紛好華  
亂榛扶易直輕燕掠微斜  
愛欲移當背憂宜摘送茶  
茗華比顏色同向國風誇

贈安南使歸國

秦淮柳影中使舫背歸鴻  
建業山河壯南交節制通  
襟涼乘海氣家遠待秋風  
仍歲頻銜命詩囊夜吐虹

題郎中顧公蔗境詩卷

昔者山陰縣風流顧愷之  
春風癡欲絕秋草澹相宜  
上馬青山送垂簾白日遲  
千年留蔗境只許省郎知

初五宿峽山口

野燒隔江明官船畏虎停危檣侵石峽高枕倚沙汀樹  
杪初弦月蘆根數點螢一垵香桂酒自笑獨爲醒

因驛舟回寄清遠令

晚泊清遠驛言懷仙李標江光浮雲樹潮信急蘭橈單  
父彈琴夜西山拄笏朝悵然一凝竚詩寄北風遙

過清遠縣愛其山水追賦趙佗劉漢墓

清遠佳山水英雄多墓田趙佗餘四世劉漢幾何年雲



勢連衡岳江源起蜀川海邦歸職貢應更產時賢

過湏陽峽漢楊僕將軍駐兵處

帆過湏陽峽攢峯劍挿天嵌巖通窈窕石壁絕黃緣將  
軍若下瀨於此駐戈船飛鳥不敢下聲名何赫然

過虎榜山

已較文場藝俄經虎榜山上有欲落石下爲無底淵詩  
人昔好事留字嵌空間摩挲殊未可駐目但悠然

寄龍水縣丞

出佐瀧水縣緬懷貞節堂春明綵服麗天遠白雲長鸞  
詔騰雙闕金冠表一方依依縫線密應念久風霜

別曲江參謀孫舜元

北望水天冷南遊瘴海涼衣霑椰葉露酒送荔枝漿上  
相憐才美邦人沐化良向來經濟熟知不愧龔黃

海漁公子爲宋昌裔作

我愛宋公子把竿長釣鰲閑尋龍伯國笑指海鳧毛員  
嶠隨波轉珊瑚入網高秦人未相識何用遣盧敖

清江釣隱

小隱清江上無心競白鷗  
蓼雲團竹屋蘆雪點羊裘  
放鶴歸何晚看花醉即休  
底須終日苦三百六魚鉤

謝中常惠倒提

扶衰得倒提散步任東西  
花柳宜烟渚溪山愛雪泥  
酒壺挑可遠竹戶咏須低  
只恐穿林石銅聲驚鳥啼

劉子中茅堂

整整築茅堂脩脩傍水鄉  
月明珠在浦竹密鳳鳴岡  
嘯

傲輕軒冕疎豪引豆觴  
敲門無宿客題句隔莓牆

李楚善山居

身外等浮雲松陰靜閉門  
桃源有仙李盤谷傍漁村  
賢聖杯中樂君臣藥府尊  
重來應待臘梅雪滿郊原

題春日山居圖

隱者有高趣幽居不用多  
松濤搖石壁樵徑入烟蘿  
倚檻看雲起攜琴任客過  
殷勤郭熙畫好句待陰何

隱居圖

寓隱茅堂僻幽尋鳥道分晴天千障雨伏日萬松雲豈  
是漁樵侶應懷鴻鵠羣小橋清淺處有竹抱桐君

畦樂詩爲王與齡 二首

爲愛東湖水築堂臨水漬寒光夜留月白氣曉成雲花  
樹不可剪藥苗時自分客來常款語琴薦對鑪薰  
栗里問淵明旁舍招雲卿荷鋤草露濕織屨柳風清二  
子俱天趣是翁忘俗情時時車馬客於此聽棋聲

懷海北張指揮

韶陽深窈窕海北鬱宕蕘冬熱蕉衫薄晴寒海族驕  
轅門歌畫一城角動招搖想見張公子椰漿日幾瓢

行年七十二

時部使者移郡勘年甲

行年七十二白髮向人羞肯羨梁江總空懷齊楚丘  
繡衣題姓字皂蓋驗春秋一自周原獵難爲渭水叟

題隱者山房

隱者壺中日仙家劫外天晴虹出丹室玄鶴戲芝田  
待客沉香火清神枸杞泉何當謝塵事閑說赤烏年

題段氏山房

結構秀峰下清江長在門吟看輞川樹眠借武夷雲白石種成玉癭藤刻作尊誰爲知己者竹祖與桐君

巢雲爲蕭伯璵賦 二首

爲問巢雲子雲居定幾年飢堪煮爲食吟即染成箋雨過龍文潤天清海色鮮相逢韶石上舒卷興悠然爲問巢雲子幽貞夙所廬寧隨龍卧壑不學鳳棲梧拂袖凌空翠因風問太虛芙蓉曾攬結五老復何如

遊月溪庵用壁間韻

百粵多精舍南華是祖山人知尊象教俗已變髦蠻明  
月青溪上清風翠竹間時時一談詠杖屨自忘還

謝烈婦

夜月香魂冷春雲別恨長寧歌折楊柳不學野鴛鴦畫  
可歸屏障祠堪配女郎琵琶彈馬上晚節謾悲涼

次楊子良催菊韻 三首

楚楚臨堦菊曾看壓衆芳紅桃承海曙白玉吐霞光韶



石多炎壤南天少肅霜如何深自悶不肯趣重陽  
楚楚臨堦菊金風護得遲黃衣誰近侍白壁貴逢時屈  
子食寧飽陶潛愛豈私由來傲霜節松栢共高姿  
楚楚臨堦菊從知品第嘉程侯情最重楊子興偏賒金  
蝶歸絲網天鷺散雪花只宜搖落賞難向艷陽誇

報春樹

但使羣芳早何嫌五月遲往花任楊柳孤注笑醪醑春  
事誰能報天機不自私此身雖老大雲錦爛離披

芙蓉仙隱

芙蓉仙隱處太守日來遊  
丹鼎飛隨鶴松壇暖卧牛  
泉凝三伏雪草耐萬年秋  
五馬朝天去山人空爾愁

題梅關圖

相送梅關去岩堯上白雲  
緬懷張相國復憶庾將軍  
夾道松陰直初晴海色分  
天彭爲井絡叱馭動成羣

得季子果嘉興書

聞汝蹤無定杭州定婺州  
雪寒探虎穴浪猛踏風舟  
千

里傳家問三年滯旅遊七旬今又四短髮不宜秋

五言排律

崆峒雲居爲曾巽卿賦

雲居崆峒下野鶴雞羣中墮甌前境忘棄瓢煩慮空蒼  
狗任時態白衣謝塵容卷幔度冉冉開鏡浮溶溶陰榻  
清媚夏晴扉粲娛冬畝耕足歲年林卧窺鴻濛少日忽  
復遠聚沙想羣童杖策笑安期出門交蒯通晚悟要爲  
達朝華那可崇嘗恨史家流老韓將無同如何曹相國

堂上留蓋公

和雲壑熟食日韻 并序別

只欲聞韶去其如度嶺賒淹留囊易澁叙別雨頻嗟老  
樹迷雲葉危牆上土花榆烟新出火穀雨早分茶紀節  
門垂柳悲風墓集鴉他鄉託萍水高興鄙桑麻酒出銅  
泉滑魚分丙穴嘉金相霞錯落錦句玉橫斜落月雷塘  
路啼鵲介子家鍾情君最厚滾滾惜年華

題友人村居

四座列圖畫半生傲丘樊布韋寧是貴軒冕詎爲尊愛  
客頻掃徑教兒日應門榮華曾把玩道誼將彌敦雲與  
水無係吾將我共存興亡自今古運數任乾坤牢落三  
間屋縱橫半畝園慕尋仙客戲書對古人言斯鞅何功  
業韓彭幾子孫神奇終化腐汙潦本無根桃李休相笑  
梅花不解村

爲中常題溪山訪隱圖

自適貴清曠駕言懷隱淪雨深禹穴外沙淨雪川濱著

述尊弘景耕桑樂子真翠屏猿滅跡繡谷豹藏身木客  
傾壺夕桐君種藥晨水烟清自媚天籟韻常新芝熟原  
輕漢松高本避秦祇應陶靖節來往問遺民

題呂仲善營丘山房圖

稷下古諸姜營丘小洞房隣存鍾令宅里似鄭公鄉亂  
後蓬蒿長春歸棣萼芳每從黃髮老最譽白眉郎一室  
如函丈羣書自大方移床分竹影掃壁散芸香輪鞅每  
苔外鳬鷺几席傍歌商懷考父玩易到羲皇建業看圖

畫平川隔水鄉參差多點染窈窕極蒼茫山勢元宗岱  
溪流想釣璜高秋憑虎踞何處覓鷹揚

追挽劉宗榮

總角從先進劉墻白下東衣冠會元日桑梓共高風內  
譜通家舊金科奕世同至今懷古道猶及拜先公夫子  
聲名早承家德業隆山輝元韞玉節苦自和熊善行東  
平最寒芒太乙通賢良賁有策著作向多功未展青雲  
翻先成白雪翁脩文期太速遺草意何窮令子稱才傑

儒科致顯融善和存故里一畝復新宮種德門逾大光  
幽石已龍典刑看奕奕圖畫極瀾瀾春日珠林道秋風  
宰木叢長懷書甲子應自問鴻濛輔嗣經仍講賓王句  
更工焚黃知有日含笑九原中

王員外赴京

喜奉綸音至遙瞻帝里歸秋風辭省掖海氣拂朝衣叅  
相深分閫員郎夙贊機金湯身作固蠻徼子來依欲徧  
羣黎德常勤四牡駢兵氓同鼓舞草木悉光輝留句題



丹荔看花想紫薇  
鴈從淮浦起馬傍越臺飛  
未得承芝宇應嗟鎖棘闌  
送君霄漢上綵鳳逐朝暉

簡徐太守二十韻

牛女垂光遠番禺枕海長  
藩宣開畫省撫字屬黃堂  
銅虎未分牧郎星暫歛芒  
化行龍伯國春動馬人鄉  
流徙歸城邑頑嚚棄斧斨  
稻苗豐戰地漚酒盛兵糧  
出入明星爛聲容赤帑煌  
衣濃薇苑露冠重栢臺霜  
兩府聯賓位元戎解佩纓  
已無鯨簸海宜有鳳鳴岡  
百貨流泉溢

羣蠻枕奠康昔襦今又袴肉藿酒如漿暇日同民樂隨  
時愛景光摩挲九曜石調笑五仙羊鐵柱悲劉鋹荒臺  
弔越王霸圖童豎駿客思海雲涼此日殷勤接仍看抱  
送祥麒麟天上石楯戟殿中郎傾倒情何極吟哦興不  
忘公侯知衮衮不數竇家芳

海桑集卷一

欽定四庫全書

集部  
海桑集卷二

詳校官編修<sub>臣</sub>翟槐

中書<sub>臣</sub>劉源溥覆勘

總校官庶吉士<sub>臣</sub>倉聖脉

校對官中書<sub>臣</sub>袁文邵

謄錄監生<sub>臣</sub>劉國永

謄錄監生<sub>臣</sub>蕭華

欽定四庫全書

海桑集卷二

明 陳謨 撰

七言律

和蕭廷菊海棠

紫綿帶露裊高枝折送窓前看絕奇  
春色仙家分已早金波賓館賞何遲  
錦裁半臂初成後鏡照新粧正就時  
聞道隣翁工炒鐵請君莫負數君詩

題蕭廷菊中書傳

蕭郎巧智似蒙恬  
兔穎狸毫健且銛  
能掃萬言資李白  
曾採五色借江淹  
匡仙洞府家偏遠  
丹鳳池頭跡漫潛  
咲與中書新作傳  
虹光清夜映書簾

雨中登舟東渝景明

市南買舟苦未得  
感君高誼最殷勤  
衝雨上山行虎跡  
褰裳度水散鷗羣  
干戈滿地身長寄  
花柳一州春自分  
待把陰霾都掃却  
與君琢句染晴雲

別竹逸極初歸錫洲

十載飄零偶此同  
明朝判袂各西東  
來時梅浦分新白  
去日仙壇掃落紅  
得句每裁雲五色  
挑燈常近鼓三通  
兩賢總是金閨彥  
善保興居錫谷中

方丘生隱居玄洲題曰小蓬萊

玄洲故是小蓬萊  
鰲背烟消五色開  
月鼎雲中分藥送  
蓬頭海外寄書來  
晴沙金屑眠龍子  
芝草瑤芳養鶴胎  
已辦遊山青竹杖  
還能酌我紫霞杯

別曾秋月提點諸公

暮年有意欲聞韶不計關河去路遙暫別玄都行紫陌  
迴瞻玉樹隔琅霄丹成鼎內春難老天入壺中日易消  
細裊爐烟頻煮茗綠陰濃處好珍調

樵閑爲蕭紹宗賦

之子採樵何所之樵閑倚石復移時忽逢鶯語思求友  
偶值仙人還看棋山中亂雲如雪屋松下清風多紫芝  
袖有長書君莫上祇今且可醉吟詩

至南安和知事陳雲壑祠龍母韻

貝闕珠宮仙樂舉盈盈初日碧波間眉如王母三千歲  
髮綰湘娥十二鬟榕葉春濃僧院寂木蘭風細釣絲閑  
渚蘋薦罷騷人醉老我何能一叩關

和指揮蘭花韻二首

名花消得玉爲堂別占薰風六月涼西子冰肌微帶酒  
素娥翠袖冷含霜相輝喜接貂蟬近共醉宜同錦瑟傍  
制使高吟清且麗綵雲散作滿城香

臨風玉立自堂堂肯爲榕陰借晚涼瑤柱歲疑疑剪水



銖衣蕭颯自凝霜操琴好在虞韶後  
紉佩還思楚澤傍  
曲江祠下遠心賞千古空懷是國香

次謝令尹喜雨韻

曲江六月有新涼令尹彈琴不下堂  
河陽豈必花成縣  
彭澤由來菊是糧桑樹連陰馴野雉  
馬駿滴水舞商羊  
豐年好寫歸圖畫爲覓當時顧長康

重陽前和王參軍二首

參軍公館竹爲扉遙對貂蟬逸興飛  
李白題詩行處有

王弘送酒近來稀錦糕時節思何極綵服興居願不違  
回望青原一千里黃衣想見照苔衣

蒼烟鬱鬱集郊扉吹帽風高髮欲飛君喜慈幃清且健  
我憐家問遠常稀萸鍾芳烈當誰並菊抱幽貞與世違  
丞相祠庭榕葉底不妨人咲芰荷衣

次周翠庭感懷韻

故園回望草成丘客館新添雪滿頭已向昆明看劫盡  
猶思滄海借桴浮昂藏可愧嵇中散款段那從馬少遊

邂逅蒲衣成一咲覓牛元只是騎牛

憲使張虛舟謁韶陽文獻祠敬簡小詩

隨車清雨洗邊塵散作韶陽十月春累世風霜爲閥閱  
一壺冰雪是精神民沾德澤安生聚君遣皇華徧度詢  
此日貂蟬輝繡斧千年風度儼相親

簡二憲郎

金玉科條兩憲郎滿空霜氣集韶陽九齡祠下聯圭璧  
五色雲中覽鳳凰表寒梅迎使節海隅秋草借恩光

繡衣報政烏臺表定自聲名動建章

追挽劉養直

校讐天祿去無日藏書善和歸幾時殷臺落日塵香杳  
象山宿草春離離玉雪未曾瞻道貌梧桐今已識孫枝  
斯文不朽應無憾刻石埋名有楚奇

戲和肱道人

道人連日醉如泥應愛銅泉浸鹿蹄內景新將丹鼎煉  
麗詞常展錦箋題迎春處處經行遍餞歲時時舉按齊

只恐夜深歡寢後不知雞向五更啼

人日登風度樓留題

憑高弔古想開元風度誰知相國賢  
八柱承天垂日月千峰列戟擁貂蟬  
龍乘海氣窓間過鵬息天風雨下眠  
忽憶重華增悵望蒼梧渺莽暗荒烟

乙巳除日次蕭極初韻

歲寒不作還家計倚遍仙人十二闌  
霜殘臘梅殊草草苔深墨竹却桓桓  
時彈焦尾清還絕不酌流霞興自寬

二友風流知我者恥將心事學馮驩

九成臺

韶陽太守臺成日玉局仙人海上歸萬籟盡如韶九奏  
五雲遙見鳳雙飛蓮峯隔浦浮春色武水澄波漾暖暉  
錯把滕王江閣比鳴鸞歌舞是邪非

葛仙祠留題

思憶仙人葛稚川舊祠冠服尚巍然羅浮自愛留丹竈  
勾漏空聞有洞天江右蛟騰青草裡淮南犬吠白雲邊

嬉遊得似無爲好冷眼乾坤八十年

三月二日爲叅軍介壽

瑞氣濃薰海色晴非關上巳與清明橘中人獻龍根脯  
鶴上仙傳鳳翼笙入幕叅軍多節槩能詩水部宸豪英  
一千二百年如戲自是空同舊廣成

叅軍庭前水香花一樹夏月取葉薦湯者三月花  
開如粟邀共賦之

玲瓏琪樹出高牆豈逐殘香媚景光翡翠屑金分戶映

木蘭墜露拂衣香濃陰遠有秋風操清味尤宜夏月湯  
倚得叅軍修竹好共將嘉實待鸞凰

贈別錢太守

夜光明月廟廊珍五載騰輝武水濱祇有雙魚新改郡  
素無一鶴可隨身儀韶鳳已翔寥廓別駕車猶望後塵  
千里江東春樹綠懷賢長有夢相親

別郭宗玉還鄉

故鄉索寞久離羣邂逅韶陽復論文緱嶺喜逢王子晉



灞陵誰識李將軍來尋錦石看丹荔歸釣清江卧碧雲  
應共高人川上樂題詩煮茗到宵分

榕樹下別叅軍再賦就簡指揮

榕陰翠蓋倚重重相送城南復向東上將故多黃石畧  
叅軍況是紫髯翁重題錦字雲生紙獨轉滄浪月滿蓬  
徙倚松根看野色青山縹緲意何窮

泊古羊渡望貂蟬峯有懷諸名勝

猶見香爐紫霧妍還隨鳥影望貂蟬舟移岸岸皆奇石

雲起山山盡瘴烟紅蓼水生連夜雨白茅露冷近冬天  
舜峯九日登臨處吹帽無由侍晉賢

題常方壺所藏易元吉蒲萄上有徽廟題識

畫圖驚見龍鬚長猶帶宣和御墨香玉蕊宜歸甘露瓮  
金莖偏潤紫荷囊移來上苑恩光異拆寄文園渴肺涼  
曾侍宮壺沾御宴令人苦憶賀蘭莊

蒼雪軒爲南雄貳守劉可與賦

蒼龍噴雪滿幽軒坐使冰壺六月寒紅袖解移青玉案

素娥清映水精盤興來剡曲餘孤棹老去磻溪寄一竿  
何日江陰來步屨相從終日倚闌看

小姑嫁彭郎

窈窕仙姿勝藐姑彭郎故是子南夫鮫人爲織同心帶  
鳳使親傳五色書曾共湘妃遊洛浦不隨河鼓上天衢  
洞庭此日瞻環珮千丈風波鎮小姑

彭郎憶小姑

青山何事翠如顰應惜紅顏鏡裏人枕轉珊瑚空託夢

杯傾鸚鵡嬾濡唇行雲仙袂遊何所拾翠芳期誤此春  
隅花流水何由見莫自陳王賦洛神

小姑寄彭郎

平湖黛色照晨粧只見風波不見郎已織迴文成錦字  
莫貪結綬綰金章馬應得意春風裏花不知名官道傍  
杜若芳洲誰共采枉教人斷九迴腸

次韻雪用白戰體

晨霜暮霰作威嚴解送瑞花拂帽簷漠漠汀沙成海水

娟娟蒲席是水簾寒深頓覺龍鱗小烟重兼迷馬耳尖  
明日臺城春色動爲誰寂寞爲誰淹

蘆管制笛

旋將蘆管裁成笛若比柯亭別出機數點殘星分遠近  
七均古調按依稀吹斜月影潮初上轉入梅花雪更飛  
歲晚江空聽寂好夜寒吟句不思歸

歲除大雪 二律

怪底推蓬重不開千巖萬壑白皚皚山陰乘興那無戴

梁苑多才想有枚  
碧落空濛龍偃蹇  
黃蘆浙瀝鴈堆魁  
上人制笛翻清思  
春向梅花調裏回

孤蓬莫歎淒涼景  
一雪翻成富貴年  
兔迹盡迷三穴外  
獸王誰幻五臺前  
遙知淮蔡平元濟  
莫管峨眉冷謫仙  
此夕金吾驅逐罷  
鳳銜春色下丹天

戊申元日次韻

午夜朝回歲亦遷  
一蓬殘雪入新年  
寒雲宿霧晴猶積  
翠壁丹崖曉半鮮  
淡淡春生黃葦岸  
汙汙波泛白鷗天

蔣山風日應妍美到日同叅不二禪

二日喜晴過采石次韻

推枕鳴鴉喜報晨忽聞佳句倍怡神  
雪迷采石渾如臘日上天門  
早是春一斗青錢沽客酒  
半簪華髮減年人  
二三禪友爲知己相對迂疎興頗真

閏五月二十七日發金陵簡同舟者

半年塵土滿征衣  
悵望關河賦式微  
楊柳磯頭悲昔日  
鳳凰臺下送斜暉  
潮來城闕鱸何在  
火裂秋雲鴈不飛

幸自故園松菊美還家莫遣賞心違

弔賞心亭火

賞心亭上通宵火萬里秋天駕祝融國內焚萊知有禁  
街頭舞馬竟何窮秦淮浪赤蛟龍怒王謝灰飛燕雀空  
徒想詞人懷往代繁華想象畫圖中

天門山

巨靈擘石鎮江干縱有丹梯未易攀雲黑蛟鼉騰出峽  
月明虎豹卧當關稍驚灩澦波濤壯宛似峨眉翠黛寒



上有飄蕭兩黃鵠凌風隨我振歸翰

題吉文費太守卷

桁楊卧地庭無謁禾黍連雲里有歌  
召父著聲先豈弟  
陽城不擾是催科  
神遊華蓋紅雲島  
興在文江白雪波  
試問三窮誰第一  
萊蕪轉覺甌塵多

寄項如山伯仲

更無塵土到柴門  
還愛疎髯點雪痕  
鷗鷺江天新保社  
桑麻春雨舊田園  
堯民擊壤應同樂  
魯殿靈光讓獨尊

况復惠連羣從好詩懷濃處酒盈樽

寄陳衡山荅其金陵歸臨貺

朱雀橋邊幾夕曛興亡燕語謾紛紛  
悵望謫仙墳上草低回蔣帝廟前雲  
征衫塵土鄉心共歸路秋雲鴈翼分  
枉沐光臨到蓬華無由傾蓋一論文

追賦聞人州判赴京

一蓬白雪上京華五鳳樓臺是帝家  
定向天官書上考還隨御苑簇輕車  
秦淮柳色皆金縷吳越山光遍綺霞

小邑三年勤撫字月明應念白鷗沙

徐韶州追和僕叙別韻見寄用韻答之

別來只憶韶州景忽枉佳章寂寞濱太守檐惟三載舊  
侍郎官誥五花新粉榆社日家家酒鶯燕江亭在在春  
苦恨雲山迢遞隔無因晤語樂天真

答南雄劉別駕見寄

瀟灑雄州別駕尊公餘攬勝出松門會稽山陰逢賀監  
丁卯橋頭尋許渾文豹何曾迷霧雨蒼龍應自長兒孫

何時容我來驚座更看優人舞白猿

簡劉子卿謝其得謬藁送至二律

神螺之山江水東娟娟玉樹梅林中自慚晚識青雲器  
多謝時臨白雪翁舊藁飄零隨落葉餘生放浪逐賓鴻  
江臯步屨頻來往更待藜光丙夜同

一片停雲咫尺中似應秋水隔芙蓉槎橫銀漢三千尺  
桂鎖蟾宮第幾重原色又添新雨潤藻情還似遠山濃  
多時謬藁勞收寄免作人間醬瓿封

別馮寅賓遊吳越

逃虛空谷絕過從  
驚見虹光射牖中  
定自陸雲遊洛下  
還尋李白過江東  
山川草木浮佳氣  
星斗文章屬至公  
丹鳳樓前回首處  
金蓮夜照玉花驄

寄劉永泰

新堂燕處獨超然  
釀有香粳釣有鮮  
九日黃花猶似晉  
西風白鴈總辭燕  
揚雄草賦甘泉遠  
劉向窮經太乙憐  
一自秦淮同載後  
停雲悵望忽經年

戲贈歸洪

江總還家白髮新樓卿老去五侯貧  
幾經紫陌看花處憶著金龜換酒人  
舞雪迴風歌窈窕登山臨水意逡巡  
東湖烟柳西山雨還有高車訪隱淪

效謠體

小池未雨蛙先鬧矮屋非貧燕不過  
老馬反駒徒苦耳  
飛蟲維鳥定如何  
漆園夢斷悠悠蝶  
南浦風迴漫漫波  
面似靴皮猶有笑才如襪線絕須歌

次別駕劉宗弼詠韶石韻

縹緲湘南接海邊  
奔波聳漢翠爭妍  
烟生萬壑熊羆伏  
日射重巖錦繡連  
泗水磬材天下少  
韶州響石後來傳  
世間信有愚公智  
未必山靈未許遷

秋夜燕集示諸友

金風吹盡燕梁塵  
公館林疎爽氣新  
露泛紫微香拂酒  
月將仙桂影隨人  
叅軍最得詩中趣  
文士宜多幙下賓  
百罰不辭慙潦倒  
苦無佳句答情真

葛洪丹井

豈復風流似葛洪  
尋仙還到紫陽宮  
遙聞環佩鏘雲表  
尚想丹砂浴井中  
白髮那能生羽翼  
蒼生坐待起疲癯  
銀瓶素縷中宵汲  
怕有蟠龍解噴風

和友人韻 二首

霜林紅葉有妍華  
出郭幽尋興自賒  
蒼耳草深非故道  
牽牛花好是誰家  
雞羣野褐絺中散  
鶴背天風蔡少霞  
邂逅平川同逆旅  
時時晴屐響晴沙



劉郎清賞何乃違休日復自扃柴扉橋邊無人禮黃石  
天上有星尊少微薜荔暗侵揚子宅鵲鵲長占子陵磯  
日斜桐葉題詩罷頭戴寒鴉緩緩歸

方壺爲常太守賦

神山秀出空同表却笑蓬萊失巨鰲未許安期間種棗  
詎容方朔去偷桃金天白龍草間伏瑤水翠禽花外高  
我亦四明狂客者登臨覽勝一揮毫

用方壺韻題曾子元晴雪軒

聞道幽齋傍雪成  
六花飛舞集簷楹  
天遊杳杳虛生白  
雲卧沉沉夜自明  
冰蘚寒光宜客賦  
陽春古調待誰鳴  
烟波却有玄真子  
時向城南問獨清

題哀節清靜一軒

幾度來尋羽士軒  
白雲無語客忘言  
吟風不憶三生石  
醉月長留太古尊  
碧落遊絲那有影  
懸崖枯木只餘根  
白鴉來往芝田熟  
應是黃庭內景溫

吳元年丁未元日即席和韻

金璫微動綵雲偏，壽祝南山與百川。  
律轉東風遍南服，天開大統建元年。  
舜峯渺渺貂蟬外，淮水悠悠魏闕邊。  
早晚蒲車催入覲，衰遲那得共輝聯。

次王竹逸韻

聞聽爆竹知新歲，坐對綰花憶舞筵。  
隔屋馬蹄歸醉客，中宵環佩起羣仙。  
道存竹簡韋編裏，詩在茶甌雪乳邊。  
送故迎新君莫笑，旅中別自一壺天。

次九日登武山韻

三首

寸懷能着幾多愁每向登臨歎謬悠黃菊脩脩冷彭澤  
蒼烟莽莽暗齊州光陰祇是留連客酩酊何妨斷送秋  
有約不聞空悵望來詩多趣苦爲酬

丹梯高處是青山曳杖無因一破顏仙境不藏雲有路  
天遊長阻虎當關懸崖果熟猿公笑深洞花開武姥間  
寄語王君須再約頑夫老矣更能頑

村家酒熟三家香只與詩人浣繡腸充庖野鴨無雙膾  
入網池魚過尺長老婦瓦盆殊罄竭迺翁客位更徜徉

不道諸生虛講席從來雅俗故相妨

次蕭子所至日懷京國二首

梅梢綴玉似凝旒  
楓樹搖紅見舞優  
化日緩隨龍馭轉  
祥雲長繞鳳臺浮  
當年法從陪華貴  
此日山杯笑濁流  
應自家人記膳俎  
時時舉按說郊丘

綵筆何人動藻旒  
南郊儀禮若爲優  
明時鼎鼎風雲會  
載籍茫茫烟海浮  
璧水育材須妙選  
鍾山應制豈凡流  
德星聚處還知否  
別有風流陳太丘

辛亥元宵和王希顏韻二首

隔窓風雨送元宵自種花燈慰寂寥  
隣舍已添榆社鼓江亭却憶酒旗招  
鬧蛾簇粉寒難整浮蟻吹波暖易消  
梅萼那分花市燭雲頭虛度鳳臺簫

喜君連日情相厚貺我華星句每饒  
流水浣花工部興春山啼鳥買臣樵  
桃枝削杖隨商老筍籜裁冠托漢朝  
雙劍雪霜深閼匣莫將虎氣夜干霄

別郭思信

望望沙園鷺渚邊綠雲忽到九州前  
春山步屨尋前度  
夜月停杯說隔年  
局上蒲翻梟雉采  
琴中徽按鳳皇弦  
河橋折柳難爲別  
更約看花句共聯

秋日用劉子彥韻二首

秋氣一日即爲深  
雨餘山翠何崙崙  
梧桐暮看不如早  
稼穡昔豐那似今  
漢詔賜租成樂土  
堯民擊壤得初心  
石床數尺長松下  
卧聽風蟬足好音

六月秋生喜閏年  
故因涼早景多妍  
燕鴻物外同羈旅

清濁杯中總聖賢  
南畝桑麻差足樂  
西江雨露復能偏  
二間茅屋清溪側  
時有詩朋送雅篇

題平原曾光遠所藏先世墨竹

靈妃娟娟湘楚濱  
三三五五乘綠雲  
雜佩倚風疑有韻  
舞衿如水自成文  
深林會待晉賢賞  
蟠石今看蔣徑分  
春蘭秋菊各天趣  
未若此君高出羣

贈雲心醫士

白雲與君君莫違  
不令塵土上君衣  
曉隨斲藥霏霏出



暮逐懸壺冉冉歸勾漏巖前尋葛令長沙道上識張機  
蹇予獨向青原下七十卧雲今是非

和楊少府登快閣用山谷韻

長嘯城頭天宇平碧山濃處看新晴過客帆檣烟霧重  
傍人鷗鷺畫圖明浪花細逐金魚起沙漲還添玉帶橫  
物色分留歸少府千年太史有詩盟

平遠圖爲祝驛丞賦

貳令新圖少府題驛丞風致罕能齊遠岫微茫南斗外

平川迢遞楚天低，已編茅屋依垂柳。  
更買漁舟度隔溪，爲待樵風清唱客。  
乘風鼓枻到江堤。

次仲氏以靜客龍湖見壽二首

長庚殘月曉西東，枕上吟餘響石淙。  
涼雨疎桐過未伏，小亭幽徑長芳蘂。  
季方難弟龍湖遠，老杜狂夫飯顆同。  
秋月華星雙入手，更攀菡萏映杯紅。

山城望見鵲鴿原，衣錦鄉中草樹妍。  
鐵笛誰當吹舞鶴，銀槎我欲挾飛仙。  
蘋花數剪微波浸，桂樹三更片月懸。

老去揆初仍作客諸生鄭重秋初筵

寄劉孝廉

芝蘭香霧隔晴軒圖史虹光自歲年漢殿每需方正策  
楚江猶滯孝廉船鵝羣暖戲池中墨藜杖寒噓閣上烟  
試把月儀臨數帖因風寄向白雲邊

同子與入院時就文廟開試院與諸公同止雲章  
閣上

一相南來建大藩金湯千里虎牙閑綵雲騰鳳迎科詔

珠斗垂虹動海關  
入院恭陪車馬盛  
序賓媿列髮毛班  
寧知交廣非鄒魯  
已有彈冠早出山

次子與入院宴集韻

荆交風氣自天開  
魏晉詞華有體裁  
石髓凝脂歸木彈  
桂香吹露送螺杯  
雲章華構文星聚  
海嶠名邦俊士來  
燈火下簾思報效  
聖心虛佇待真才

老幹詩爲周中丞賦

昂霄聳壑三千尺  
若比莊椿別自奇  
冰雪每堅金石節

風雲長遶鳳皇枝  
武侯古柏神明力  
召伯甘棠豈弟思  
却上烏臺凝望處  
棟梁材是廟堂姿

八月十五夜宴明倫堂前榕樹下

舉杯待月月苦遲  
金天一碧寒玻璃  
雲升復隱榕陰外  
風送俄經泮水西  
丹桂子成金榜動  
紫薇人醉玉繩低  
鵬鵬萬里非難事  
安用人間八駿蹄

八月十七日開榜公宴

科詔賓賢兼百粵  
省闈開榜秩初筵  
塵飛車馬羊城外

鼎沸笙歌海角前進士褒衣班席左陪臣軟帽插花偏  
曲江鴈塔題名處爲問何人最少年

送叅政周公赴臺中丞任

省垣榕桂青復青紫薇花發秋冥冥雲收瘴海懷霖雨  
月滿烏臺候法星五管山河歸節度百蠻草木被威靈  
還朝先把賢書奏榜下懸知有九齡

黃仲弘捧詔至平川却回賴兼懷諸友

崆峒山翠似金華坐使初平不憶家香染紫泥隨綵鳳

花簪白髮麗烏紗平川對酒松風薄貢水看雲鳥道賒  
痛飲讀騷空有約長歌伐木興無涯

望蒲礪懷安期生

欲採仙人石上蒲常思雲外借雙鳬童男已逐樓船遠  
使者猶煩海道紆花下金丹煎白石海中瓜棗獻清都  
時時飛珮商岩去咲殺園公定漢儲

驛舟回寄楊子敬長司陳國玘知事

韶府才猷屬兩賢愛予枉騎數相牽江山悵望一千里

金石交遊五六年載酒問奇官舍冷看花賞勝舜峯妍  
東還却有南飛鴈遙寄新詩武水邊

題朱雪巖小影圖文公之後居南雄者

一鶴傳書海上回氅衣正對雪花開燕雲賦罷空前席  
粵水歸吟但廢臺遺像有神看畫史諸孫傳業待春魁  
考亭雲谷高風在長有書香付後來

七言排律

清江阻風訪劉起東茅廬中



十年再見東海公，夫妻賓敬茅廬中。  
不計有無心淡泊，難忘故舊日從容。  
陽春白雪何求和，漆髮紅顏似返童。  
鼎煮蒙山雲細細，盃傾桑落綠溶溶。  
市朝雖近塵還遠，絃誦常聞道罕同。  
重話桃源真隔世，獨行客路況嚴冬。  
一川雪景惟飛雨，三日江船尚阻風。  
第覺久淹成愧負，寧知相厚轉情濃。  
故人谷口歸耕處，安得扶藜訪有熊。  
煩君問訊須珍重，早晚徵車起卧龍。

元日觀燈復陪指揮巡城東同行諸公

遙聞太乙下清都五夜香風溢四衢楊柳連營垂虎帳  
芙蓉壓水引金吾蟾宮送月雲頭淨相府延春夜禁無  
粉扇榴裙歌下里雞皮鶴髮舞寒胡花枝挿燭頻頻換  
泉乳澆茶細細娛假面拳毛獅子嘯散花烟火壽星扶  
輿闌更自巡城鑰時泰還欣絕警柝遊騎追隨雜耆老  
吹笳激烈混笙竽飄飄吟句叅軍送落落神情長史趨  
自嘆衰遲多白髮苦無錦句付奚奴

次姪孫士瞻韻

我家都榦舊徵君五百年中遠有芬宗譜太丘前史美  
科名南渡近時聞人言閎閎星之斗代有雲初鼎出汾  
吾子翹翹雄作士英姿了了幼能文他山有石能攻玉  
惡草雖猶不亂薰十年叅晤窮經苦一日梟鸞戰藝分  
鶚薦已追雲表鵠錦還仍采泮池芹波光晶晶鷗同社  
松頂昂昂鶴不羣珠浦別來秋洒洒歛江吟斷葉紛紛  
投桃多辱諸賢句報玖空慚五色雲

五言絕句

秦淮詠古

不曉秦淮水秦人苦浚之亂來波浪作猶似祖龍時

題墨竹

四首

清風滿竹林酌酒薦鳴琴懸知大小阮於此開塵襟  
靈雨何從來脩篁有妍色憶在逍遙堂寒更聽蕭瑟  
千霜與百霆沉沉自寒碧春雨復驚人龍孫長三尺  
裊裊炫初服鏘鏘鳴瑤琨美人隔湘水君子在淇園

題畫鷹

二首

天風振枯梢獨立何所營愁胡休側目海宇已清平  
枯榦立亭亭由來愛鵲鴝何當草間奮相逐上清冥

西林八景

鳳凰峯

青峯初拔地丹鳳條冲霄仙人明月夜於此聽雲韶

琵琶洲

春水挹芳洲宛宛紫檀槽羽人歌洞章不省鬱輪袍

偃月岡

蒼松寒翳翳瑤草秋垂垂平岡如偃月偏與落星宜

落星石

星君避太空入覲太微中如何化貞石奠此高明宮

流虹岡

湧月散金波流輝動神螺海翁逐鷗戲孺子濯纓歌

噴珠泉

滿地碎珠璣向日騰光彩昨夢窮河源天澄萬星海

藏蛟室

福地穴難藏真人劍拂霜還歸賈傳井應作少年郎

伏鵠塚

伏鵠守枯塚黃金骨似沙化為雙白鶴飛上太清家

秋林

秋林本自萎朔風勞爾怒客子賦無衣哀鴻夜中度

次郊行韻

煮茗樂濃春看山日日新遙知獨醒者却是太平人

懷泮池諸友

幽懷落泮池古栢守朱戶美人秀䟽髯望望隔烟霧

答送暖枕軟履二首

暖枕便衰老尤宜雪夜吟邯鄲官道上誰識呂公心  
軟履蒙佳貺平原客未知下邳圯上去長有一編書

七言絕句

快閣脩篁古木圖二首

老去張騫西髮華乘風曾記到天家回看粉壁千年樹  
還是銀潢八月槎



風流貳令寫蒼筤判簿題詩白雪香太守公餘時倚檻  
滿天風雨起瀟湘

酈彥誠蘄州二首

青原山下客思家喜有淮船載月華湖口晴雲收雪浪  
蘄陽春雨長萱花

酈生風采故依然奉母還鄉髮尚玄升堂喜見高都護  
對酒應懷葛稚川

題吳推官江山覽圖四首

憶昨蓬壺戲翻廬教入海澹忘言祇今亂定看圖畫  
幾處樓臺幾曲村

汾水秋風草木疏龍門山色秀芙蓉巖扃容有文中子  
高卧白雲間著書

萬竹沉沉山下屋千波汎汎石根船逢迎沙岸飄蕭者  
不是玄真定謫仙

江南秋色鴈來歸林壑風烟草樹微公退展圖頻北望  
太行山上白雲飛

馮大善胡琴歸宜春求題 三首

白下磯頭綠樹肥  
宜春臺上白衣歸  
山童把得琵琶在  
惆悵開元舊譜稀

上國春風馬上郎  
花間絃索斷人腸  
願留一曲清平調  
別有知音在太常

馬尾蛇膚水繭絲  
能吟解語意遲遲  
彈到天高雲淨處  
秋江唯許白鷗知

題曲江春遊圖

沙明竹軟曲江橋折水花枝挂酒瓢  
指點杏園飛赤驥  
惱人應是董嬌嬈

題漁樂圖

柳下漁舟小亦寬  
兩家十口共團圓  
樂醉來唱徹漁家傲  
千丈風波冷眼看

題孫竹圖贈黃道士歸山

金華仙客此幽尋  
爲愛瀟湘雲氣深  
醉騎白石還山去  
一箇蒼龍伴獨吟

次十四夜望月值雨 二首

雲翳深深掩玉輝，故飄香霧洒蕉衣。  
竹林莫道蟾宮遠，已報郎星入紫微。

曾共仙人萼綠華，雲中手弄金背蟾。  
嫦娥偏愛清塵雨，徐舞霓裳下漢槎。

次荔支韻賦 四首

猩紅染就錦苞肥，解映金袍與繡衣。  
幾度醉吟芳樹下，渾疑夜燎續朝暉。

海山仙子玉肌肥  
故著輕綃紫霧衣  
猶記紅塵飛騎去  
昭陽宮裏媚晴暉

磊落華堂火齊肥  
佳人爭比茜紅衣  
瓊枝笑把銀鉶挿  
絕勝春紅榮曉暉

正賞端陽荔子肥  
珊瑚清映雪羅衣  
誰向樽前揮綵筆  
只今容有謝玄暉

次叅軍偶賦韻 三首

花底壺蜂報午衙  
枕前莊蝶未知家  
驚人忽聽尚書履

唾玉長吟學士茶

燕鶯好語傍南衙  
櫻筍誰人似故家  
頓遜并無花上酒  
南華還有貢餘茶

老我猶堪屈宋衙  
才名苦憶建安家  
枯腸文字搜都澁  
恨殺松花雪乳茶

無題

只合長庚伴謫仙  
清吟酷愛夜如年  
五更鐘動無人喚  
飛步松梢看月圓

爲知縣謝實林題紅梅 二首

孤山傲雪壓芳涼  
換得東風到玉堂  
更聘海棠爲侍女  
桃花馬上少年郎

逃禪染白能爲黑  
爭似王家一剪紅  
憶共揚州何水部  
醉吟身入綵霞中

題畫龍

長吟噴薄浪生花  
碧海銀潢處處家  
有客抱琴天上去  
迴看鱗角似仙槎



題畫竹

鳳尾脩脩雨外分  
武公風致少能羣  
七賢最有山王達  
底事延平詠五君

題周知事雙竹圖

一徑清風兩玉人  
畫圖疑在渭川濱  
石根細長瀟溪草  
寒翠滿庭長是春

題青山白雲

來訪仙人問白羊  
小橋流水繞微茫  
白雲滿谷青松暗

定是金華是枯蒼

焦磯寺

過盡三山見翠屏  
金銀梵剎接青冥  
江心礪石何年化  
亦恐飛來是落星

題赤壁扁舟圖

霜清水落不容刀  
山石奔雲作怒濤  
海上仙人歸玉局  
又隨孤鶴過臨臯

題曾秋月提點壽竹圖

羽葆霓旌翳石根蓬萊雲氣伴朝昏仙人細酌長生酒  
閒看蒼龍子又孫

題周草亭枯木圖

雪裂懸崖墮一龍槎牙長礙九霄風若爲借與張騫去  
身到銀潢咫尺中

題王子賢雲樵山房二首

官閒日日逐樵蘇心寄浮雲樂有餘谷口歸來身未倦  
下簾細讀買臣書

王質當年底事癡斧柯爛後覓歸蹊君歌一曲下山去  
不向仙人局上迷

題竹贈石城主簿倪仲威

越王臺下送飛旌折贈琅玕百尺長歸到石城官舍冷  
月明四壁動龍光

題墨龍贈化州經歷徐子重

徐福仙人海上家蒼龍相對卧烟霞乘風欲向丹霄去  
還是張騫八月槎

南康仙臺觀呂巖嘗游焉觀中人不識也死葬其山  
後一道人來尋師啟棺惟二白石化爲雙鶴飛去  
今所畫巖像特異所見手持錢一文

賞遍羅浮度庾闕仙臺重訪羽人閒已收白鶴歸天上  
猶把金錢翫世間

風樹亭臨江經歷潘德全進士其父塋海寧之彭  
坡待制趙仲睦爲書樹亭賦二絕

得祿其如退養何海寧墓木拱彭坡清江碧嶂官居好

時聽悲風響樹柯

墨妙誰題楓樹亭翰林待制有儀型九原含笑應無憾  
更待焚黃換刻銘

題四皓圖

卧聽松風行採芝人間那記有秦時安劉調笑高皇帝  
何似山中一局棋

海桑集卷二